

畏齋薛先生藝文類稿

畏齋薛先生藝文類稿卷之九

南京戶部郎中門生徐材編輯

戶部郎中門生沈奎父正

序

傳燈要語序

文中子云佛西方之聖人也行之中國則尼軒車不以
適越冠冕不以之胡非所尚也夫生天地之中而會中
和之氣者惟中國之人爲然故聖人之道可行然猶有
南北方之強剛克柔克之教而况四裔所生言語之不
通聲教之不及欲以平康正直之道化之難矣彼佛氏
者生長其間深生憐憫欲以聖人之教施諸裔方而知

其欲之終不可禁也于是毀形示教以消其欲之根又知其心之可以悟而入也于是慈悲引誘以開其心之明強梗獷戾之人既無欲以用其外面又有言以柔真中不覺歛嗔感悟稽顙歸依而後四裔所生得與中國之人並生天地之間以不罹于殺僇爭奪之慘而古今聖王亦遂因其俗而不變非不欲變不可變也然則佛氏者雖非中道其于聖人剛克柔克之教不亦少裨萬一矣乎不然彼其聰明妙悟使得遊于聖人之門其所造詣當不下顏閔豈顧不知爲此而爲彼哉其志亦可諒也昔老子與孔子並時而生然孔子不聞老氏而惡鄉原聖人之心誠知老氏之說雖善而高然有激于文

勝之弊存其說亦足以救過扶偏不若鄉愿之色取行
違爲亂德也噫今世學術之弊其爲佛氏乎其爲鄉愿
乎讀予說者諒予之心而有得於言外之意當不以是
罪予可也是編皆諸佛要語闡明心源予旣錄而傳之
因以予言弁諸其首

大家文選序

并跋

文選一編凡二十二卷選九大家所作而賦則取之雜
騷諸體備矣閱擇精矣學者造詣深純超然自得而欲
律度身心準繩造化以肆意于有無恍惚之間以與古
之作者爲伍則是編也固王良造父之銜勒哉九家爲
李曰氏杜甫氏韓愈氏柳宗元氏歐陽修氏王安石氏

蘇洵氏蘇軾氏曾鞏氏冠以屈原宋玉凡十有一人編
成于蜀南大觀臺刻于嘉靖己亥秋吉日後學江陰薛
甲謹序

此書刻于瀘中予同年安君膠峯分憲于蜀雅善其
書乃嘉靖乙丑復從而刻之錫邑君問予何以專取
數家予應之曰屈原之騷雅頌之正聲也宋玉之賦
李白之選國風之餘韻也律至杜甫其詩家之六經
乎他有作者範圍不出此矣至于六秦漢雖古而規
格之成追昌黎始備繼之者莫之能越故子厚永叔
介甫老泉東坡南豐與退之並稱七大家內如子厚
南嶽諸碑深入佛乘三昧亦宇宙間一奇觀不可得

而少者未可以非吾儒而外之也但諸君子于聖
傳心之學樂未有 之名家則可謂之知道則未
也必欲根據六經淵源孔孟則有濂溪太極圖說明
道定性書橫渠西銘在此則學道者所宜奉為服膺
不當以文章側視之今選不之及者非敢遺也不敢
及也此愚選諸家之微意也是歲春仲三月吉日謹
跋

贈邑侯王西許臺榭序

古今論治者雖以知化裁善通變為至然必識治體而
後化裁可施至于治體所在則非問學之精持循之力
不為習俗所移者未易識也國家設官其在外則有監

司有守令而獨縣令稱爲民之父母夫元后作民父母則凡承君以蒞民者皆有父母之責者也而獨于令稱之何也令親民者也親民者令之體也爲親民之官以求親民之體則必于父母乎思之父母之于子也雖其罵詈之鞭笞之爲之子者亦必旋繞抱持而不忍釋何也愛結乎其中也故治至愛結于中則刀鋸不能刳利祿不能誘天下事無不可爲者矣予爲兒童時見長民者猶降等威畧邊幅以家人父子之道待民其情必相通其心必相安民不知令之爲尊而令亦不自以爲尊也邇年以來則稍異矣體貌之崇等威之辨往往與民隔絕而上下之情不能相通則民之怨憎僧反得張官府

之勢以脅吾民而田野小民有事于官府者詠于浮言
寧傾產以媚胥僮而不敢覩官府之庭由是上下之情
愈隔而官府之事叢脞愈甚以至大弊極壞而猶不自
悟以爲是民頑爾不知治體不明則化裁無術有以致
之也噫居今之世識治之體而無忝于親民之任者則
吾邑侯西澣王公其人乎侯以進士任永寧調繁而來
其始至也適當吾邑彫瘵之餘簿書紛如通及胥如瘡
痍困苦之民習熟凡聞意侯必將勵精明之治以立矯
矯之稱莫不矍然恐瞿然有去志而侯之視民亦如驚
魚駭鳥惟恐其散凡網罟罫弋之具一切屏去而惟以
誠心善語煦嚙而撫摩之鎮之以寧靜處之以從容訟

者至庭俾得盡輸其情有未悟者反覆誨諭以開其心而不窮以辯有逋負者寬其期曾示之利害俾以漸償納而不強以或賦役政令之施民所便者行之所不便者立爲革之使各得所安而不違其欲不閱月而驚疑者安懼者釋又閱月而流移者來歸矣簿書之紛雜者理負者完矣方是時候之勸民未嘗以賞也而民自安于爲善其懲民未嘗以威也而民自不敢肆于惡侯方鳴琴晏息于一堂之中而民自得于江山百里之外若家益而人賜之者以心相諒而不以迹相疑矣夫侯豈能必斯民之信已而顧簡易若此哉識爲治之體也得親民之道也取必于已不取必于人也侯其民之父母

矣乎傳云其政悶悶其民淳淳史稱何武所居無赫赫名去後嘗見思侯之謂矣兩漢循吏賜秩賜金久任之而後超遷之我國家定制三載考績卓異者卽人而爲侍從侯兩治劇邑政績茂異有功於吾土而吾土之人度侯之不能久也安得復隆古之典借侯於此以長活我民哉侯學問精純不爲口耳膠固之習其養之也盛故其發之也光士大夫聞侯名者識與不識莫不愛而慕之江院黃公與鹽院溫公相繼復命將還朝而侯始蒞任二君子之於侯猶未相與也而獎勵之語若久要然者信侯之深知侯之必能有成也吾邑師生以二君子之誼不容泯也乞言於予以爲侯重予惟旌獎賢能

監司責也舉賢能而加諸上位銓曹事也又何以予言
為乎顧親民之學不傳而侯獨得之則予不容無言以
為繼侯者告且以告吾邑之民而慰其愛侯之情也

易象大旨序

易其象乎象其理乎神物聖心冥會而成者乎一陰一
陽一奇一偶一往一來一上一下生生不窮而象形焉
三之為八重之為六十四而天地之間萬事萬物之理
備矣聖人者神通意解目擊道存設卦以定其名繫辭
以闡其義是以有八卦之名有六十四卦之名名以象
也是以有彖辭有爻辭辭以象也象有貴賤有大小有
險易準之者中正配之者君臣民物稽之者乘此應

象之蘊也以天地山澤雷風水火統其類以健順動人
陷麗止說盡其情以乾父坤母長男中男少男長女中
女少女正其名以形體物宜至隱至賾至動至變之類
擬其事以元亨利貞吉凶悔吝厲無咎諸占定其趨象
之精也象有成卦不必伏羲觀象而得名者伏羲其祖
也有成辭不必文王周公觀象而得辭者文王周公其
宗也可受不可傳可心悟不可言說泥文者滯執數者
誣宜聖憫焉爲之說卦卦義彰矣爲之彖傳彖辭顯矣
爲之象傳象辭晰矣上下繫發其例也文言備其德也
大象廣其義也序卦次其列也雜卦括其餘也後之君
子端居而玩神交而求無文而文生焉無言而言成焉

可以立象可以命占將無俟於三聖而開天自我矣故
曰天地設位聖人成能神謀鬼謀百姓與能與能者宣
聖力也予懼象教之不傳也作易象大旨

劍南文稿序

古今文制之變有四焉典謨變而爲制策制策變而爲
詩賦詩賦變而爲經義雖制與時遷代各不同至其宣
精孕和開物成務歛乾坤清淑之氣寓之規格以黼展
皇猷恢張化育則自敷奏明試以來未之有改也譬之
方圓大小隨器異形而其用一也經義取士之制昉於
朱子之議而盛於我朝洪武永樂之文希夷澹泊知大
炎玄酒歷成化弘治間渾厚敦龐又如大呂黃鐘乃今

則化聖日隆程式所載披晰日星昭回雲漢真可媲美
典而驚鬼神矣予家居得與諸友羣聚後虞菴中而識
劍南沈子其文平順明實若不經思而有餘味其運筆
隨難易大小皆有可觀而蹈襲者莫之能及也予以是
深器之丙午秋先榜一日予與延陵趙子論邑中人材
可中式者予曰他不能知知之者惟沈子乎已而果然
又十有三年而魁天下則理益精文益粹雖予亦不能
測識之矣今刻是也同門陳子旣詮次其文以予有一
日之長請予言惟昔蘇長公有云文章如精金美玉市
有定價非口舌所能貴賤若劍南之文予安能以口舌
貴賤之乎傳之當世自有知者

贈周衛陽節推序

先生之道散於六籍而布濩于吾人之心吾惟純心以
來之則其偏其全其得其失若辨蒼素數一二有不可
得而掩者而人顧未有能何哉限於法制囿於耳目以
小得爲足而無遠大之志故也惟夫豪傑之士爲能自
信其心以闡明乎真是真非之理而不爲耳目之所膠
纏法制之所束縛此斯道之所以有傳生民之所以有
覺也國朝以經術造士而以宋儒傳註爲宗凡教者之
所以教學者之所以學無有能外焉者而陽明王先生
獨自得乎致良知之旨與理無動之說夫曰致良知則
於卽物窮理以致吾心之說有所不合矣曰理無動則

於靜存動察交養互發之說有所不合矣方是時也羣
譏衆排謗口曉曉而先生信之愈篤持之愈堅卒能直
伸其說以開悟人心若先生者所謂豪傑之士非耶甲
晚聞先生之學寔始而駭中而疑廼今循先生之言以
契勘吾夫子之言如出一口可以條分縷析而曲當入
心信乎先生之學孔門之嫡傳吾人不可一日而不講
者也間卽是說以諭同志與整歛於縉紳士大夫之側
亦鮮有不合者而衛陽周君信之尤深嘗讀傳習錄而
以書示予曰聖賢千言萬語不過靈靈明明只這些子
但昏昧放逸則明而復晦然求其真晦則又不可得噫
君之所謂真晦卽陽明之所謂卽物以致其良知而見

聞俱泯者耶卽陽明之所謂戒懼以慎其獨而上達于
無聲無臭者耶陽明之言非有期於君君之見非有私
於陽明而符合若此者其心同其理同也若君亦可謂
今之豪傑矣君觀政刑曹故事進士未受職者得以從
容郎署君獨講究律法辨析詳明諸曹有疑獄咸取決
焉以故出而理刑吾郡推其所餘以覆幬我民若決江
河而之海也茲復以其潛心於律者潛心於道則其於
斯道也有不如今之沛然者耶發良知之蘊以擴陽明
之學於天下使天下之人皆得以通於心學趨於遠大
而不爲耳目之所膠滯法制之所束縛端於君有望矣
璽書下徵戒行有期屬邑之長懷君之德而不忍其遽

也相與乞言於予以致其情惟昔蘇洵氏有云千金之
子天子之宰相可以貧富生殺乎人而不能斷一言之
幾乎道則道之所在尊莫有尚焉者故予於諸君子之
請不以賢聲之茂寵命之隆爲君榮而以君志道之專
任道之勇爲諸君子復以明君之所以爲重與有識之
所以重君者蓋在此而不在彼也

贈大中丞周公總制江右序

古今言財賦之盛者必首東南故供邊之儲惟東南爲
多而撫治之臣惟東南爲重我國家啓自

成祖定鼎北都罷海運通漕河其底慎之賦輸將之宜
雖更歷名臣多所裁定卒至文襄周公始集厥成而繼

文襄之後以與文襄勲名相後先則今大中丞觀所
周公而已公初以御史按治蘇松適倭夷入寇變生倉
卒軍伍倉積咸無宿儲一時應募之兵又皆孱弱無紀
律而供餽之需朝歛夕屈公身履行伍之間選將練兵
推移節紱以濟一時之急百姓望之屹如長城恃以無
恐及期將代恐其去也詣闕留之

聖天子順民之情俾復任一年又採公宿望卽其任使
董學政如是者又三年大臣度地方終不可以釋公廼
疏請轉公卿秩將卽付之今職而公適以憂去不果留
東南爲留都重地

聖天子注意特深自公始來歷于解任以及終制首尾

九十有餘年而保障之規尚有未備撫臣雖屢更卒無有當上意者由是民之望公者愈切而上之知公者愈至甫服終詣闕即以今職授之公閱歷既久柄任既專其來也若造父得良策而驅車就熟也其化裁而變通之也若計然治生織悉具備而其握機秉要勸中肯綮又如庖丁視牛刃迎而躊躇意滿也自是軍伍有額兵無冗矣會計有數食無冗矣其他百務利有可興敝有可祛者施行報罷不俟旬日卒能轉危就安圖難爲易舉百萬瘡痍之民而燠休飲食之此公所以酬上之知慰民之仰以有光于文襄者職此由也平居持身嚴正清苦朝絕問道之使臨取吏民煦煦然如家人父子至

義之所在則風裁獨持莫可撼搖有薰然之和而又濟之以毅然之守方夷患之作也天子使貴重臣視師海上氣勢薰灼凌轢百司眈眈然有垂涎所屬之意公時董監軍之任一裁以法貴重臣跼蹐不敢動則百計摭撫以伺公間而亦卒無可乘也說者以公之勲名雖頡頏文襄而律已之正執法之嚴實裨文襄之所未暇真知言哉吾邑濱江倭寇出沒尤公之所軫念嘗儲粟萬石授之有司戒毋輕動逮城圍不解卒賴以濟他如憲臣駐劄之所與水次兌運之宜咸復舊規以蘇民困則又他邑所無而吾邑得專之者故邑之士民感公之德比於他方尤深乙丑秋聞公將移江右謀所以殂

豆而尸祝之未及也相與屬言於予以識不忘而予辱
與公兄履所先生偕第已丑有通家之誼情亦有不容
已者爰從士民之後輒爲之序并以識吾公然公方受
知天子不日將入輔他時之所樹立當有史不勝書者
顧謏陋何以知之聊效葑菲之忱以備彤管云爾

贈邑侯王西澔遷官戶曹序

蓋聞善攝生者必探生之原然後生可得而理也善爲
政者必探政之原然後政可得而治也吾邑在昔稱爲
易治有道院之名邇年仕者多不欲來來者或鮮克善
其後惟我西澔王侯聿新厥政以底于成夫侯之政所
以能有終者何哉彼不得其原而此得其原也朝廷取

士言以通之凡爲學者皆然而有出于誦數之外者學之原也其用人也必法度以齊之凡爲仕者皆然而有出於法度之外者政之原也侯之學吾嘗聞之矣省躬約已動必求心是精一之傳也而非誦數之謂也侯之政吾嘗見之矣平易近民不爲褻暴是執中之旨也而非法度之謂也精一之傳執中之旨其政之原乎夫宇宙之大民生之衆其風土習俗之異尚性情質稟之異宜誠有不能盡同者至其是是非非好生樂逸之心與我同也以吾之心通彼之心則所以明其是非公其好惡者在我而不在彼也惟吾之心不精則粗粗則愚不一則岐岐則雜愚與雜交而囂昏瀆冒之弊生此

政之所由以壞也知其不可而反之善矣然或眩能矜
名高自標異則其弊雖與嚚昏瀆冒者清濁有間而害
政則均如邇年吾邑之政之壞議者知爲夷寇之擾與
繼治者之未盡善而不知眩能矜名之弊已有爲之於
先者矣姑舉耳目之可詳者言之往者邑居殷富邑有
大政大役有力者輒爲任之千金已上之產之家不知
有役也兩稅限及如期而徃百六十年以來無逋賦也
自好名之弊生始有爲抑富之說者上之人意見一立
則下之人羣而攻之自是富者不能自存而私室困矣
私室之困則抑富之說爲之也又有爲恤貧之說者緩
于催科本爲美政而姑息過甚遂至長奸自是逋負日

多而公室之事亦日困公室之困則恤貧之說爲之也
持是二說以立威取譽譽成於已而患遺於人雖無倭
夷之變與繼治者之未盡善邑欲毋壞得乎道有常經
過不及其失也均此探原之論所以不容已也通若我
侯之爲政也清苦潔白無纖毫染累旣一洗罪戾清
之弊而仁愛子惠之心孚於四境又能使人人怙冒若
家賜而人益之較之眩能矜名者真霄壤矣故曰善探
其原其卒有以復道院之稱之舊而享循良之譽者在
此也始侯之來也瘡痍之民恐恐然重口而立予以四
諸富道之獎探侯之心以諭其成至是政成秩滿陟戶
曹于留都邑之人又慶予言之有徵也俾復申言一

以爲侯賀夫侯之心天下之心也侯之政天一之政也
一邑有徵天下獨無徵乎治莫難于縣縣在今則吾
邑爲難吾邑有成況其他乎自是而往皆坦途矣何
言予何言聊識仰德之私爲吾邑諸士大夫昭贈處之
表云爾

賀郡守湯公陞蘇常四府兵備序

儒者論道必以天之陰陽地之剛柔配人之仁義其言
曰人之仁卽天之陽地之剛也人之義卽天之陰地之
柔也然仁主恩義主威恩與威雖若相反而仁以義立
恩以威行則又未嘗不相成也故言仁而義在其中矣
言恩養之道而威嚴在其中矣國家稽古建官尊卑相

承其在外則令之上有守焉守以牧養爲職者也牧養者仁之事也守之上有監司焉監司以糾察爲職者也糾察者義之事也然守以牧愛爲心而爲令者各以守之心爲心凡有違于仁者莫不知所戒焉則牧愛者乃所以爲義也監司以糾察爲心而爲吏者各以監司之心爲心凡有涉于義者莫不知所勉焉則糾察者乃所以爲仁也故曰言仁而義在其中矣言牧養之道而威嚴在其中矣吾郡交川湯老先生以郡守進副臬司即奉敕整飭吾蘇松兵備事公爲人持重識大體不屑屑爲苛細之行而細舉目張庶務自理至其律已之嚴纖毫不染徃歲入覲行李蕭然真足以繼清風兩袖之稱

者他如裁冗濫謹出納不動

而惠加于人人若是

者又不可縷數以故吏畏之如

明而民戴之若父母

聞其晉秩也莫不私相慶幸以

得望公履舄而沐

愛于公也咸曰公其仁人也

不知

仁乃其所以爲

義也夫謂公爲仁者以其能潔已也

亦則乾範端感

乎遠不漸畏于人而人自畏之譬之水火然人謂冰火

爲仁者不以其生人乎然江海之大莫敢有輕越焉燎

原之烈不敢有輕履焉何也知其不可犯也昔之人有

攬寧于國而貪墨者不驅自去作相于朝而聲伎者不

戒自歆彼豈有所靳于人哉不可犯之道不怒之感無

所靳于人而人自畏之也公之道亦若此而已矣公譽

望方隆由此晉而爲卿佐爲輔相匪朝伊夕度其道亦豈有加于此乎信乎仁義之道一也知公之仁則知公之義矣知公之所以爲郡則知公之所以爲臬爲卿佐爲輔相矣公以仁義之道成諸已而亦以仁義之道成諸人其在郡也凡屬吏之賢者必與而進之獎而成之縣博林君會春有志士也公使親篆靖邑林君感公之知己也旣兢兢焉冰蘖自持以酬公之知而又乞言于予以識所以感公之私予自顧不文無以發揚公德也固辭不獲則曰予之請不專于文以予之知公也予悚然遂書之俾上于公且以告公之屬吏俾知所以師公而以仁義之道相成也

致其情予惟方今之時理學大明林君行將戰藝春官
對策形庭以其學大用天下一隅之治雖無言亦可也
惟其悟道以心識達治本關係于人文者寔重則非有
言不可也遂書之

贈童司訓序

或有問師道于薛子薛子曰知父母之道則知師道矣
夫父母之于子也既免于水火矣必納之鄉塾焉拜稽
以竭其誠脩脯以通其意所以隆其師者無弗爲也爲
之師者有不以父母之心爲心乎大君之愛士亦猶父
母之愛其子也既養之小學矣又進之大學焉師儒以
簡其負旌之以優其禮所以厚其臣者亦無弗至也爲

之臣者有不以大君之心爲心乎故知父母之心則師
道得矣或又問舜命九官自伯禹摅治于內十二牧分
治于外其職專一事者凡七人而教居其三敬以敷五
教者契也寅清以秩三禮者夷也直溫以諧八音者夔
也此皆以教爲職者也王朝定制內自畿甸外而方岳
其成均與郡縣學之官有定員焉而又不皆專其事其
于教道得毋有未備乎曰是不然夫制不必同而人同
人不必同而心同心也者不以時限不以制拘者也夫
敷教不徒曰教而曰敬敬也者此心之不忽也吾能毋
忽此心是亦契而已矣典禮不徒曰禮而曰寅清寅清
也者此心之不污也吾能毋污此心是亦夔已矣諧

樂不徒曰樂而曰直溫直溫也者此心之不乖也

毋乖此心是亦變而已矣得其心則官不必備而師
亦得不得其心雖備其官無益也故一官不必備惟共
人言爲師之道不在制而在心也龍山童君以明經分
教吾邑君爲人循循善誘得士子心而敦朴忠厚不
爲流俗所靡之習似從事於心學者履任未幾而鹽院
某君有優獎之檄君之僚暨諸士子感欣欣焉問言于
予予故推父母愛子之心與古今所以設官待士之意
以爲君重俾君益知所以自勵焉且以諭諸同志者曰
果能是可以爲師矣來乞予文者林君某周君某并
生某等若干人咸具名如左

畏齋薛先生藝文類稿卷之十

南京戶部郎中門生徐材編輯

戶部郎中門生沈奎校正

誌文墓表

明故兵馬指揮使張君墓誌銘

昔人稱士君子立身明倫爲大倫明則自行有本而材
之短長可畧故孔子以宗族稱孝鄉黨稱弟爲士之次
爲其有本也予嘗執此以律天下之人無一失者如金
吾張君之卒君早失怙恃事繼母曲盡孝養母性嚴
獨鍾愛君今已出此其感乃有自於子道何知也與
母兮愛衣服飲食必共待猶子如已子寸財尺帛

不以自私第以公道廢業君捐已產代之償至再三無
吝色此其於兄道何如也凡三娶閨門雍肅若嚴賓侍
膳有出者雖既老不假以顏色他如赴人之急賙人之
乏汲汲無情志有負者不責其償姻黨多賴以保其室
廬元卓然諾鄉閭有不平尙君一言爲重此其刑于之
化伐木之誼有足多者嘗任兵馬指揮使官南城都會
之區五方之人所聚狙詭驚驚不能一律齊君以誠信
待之皆愛戴稱爲仁子庚戌歲北虜犯順都城戒嚴君
部署所警盜竊不敢發當道者委重之其致政而歸也
旌獎之賢士大夫咸爲詩歌以重其行有自九鄉出撫
茲土者聞君已沒猶召見其子慰恤之且爲直其所屈

君位不甚顯而能以一職自效取重當時有如此則於
事君之義亦庶幾無愧焉噫若斯人者稽其立心制行
非所謂可稱于宗族鄉黨者哉君諱騰字正夫始遇
選食判江陰因家焉凡十序至君考諱某娶趙氏一君
繼娶朱生弟縶父以君貴贈如其官母暨君之配陳氏
陳氏朱氏皆贈孺人子五人思念懷慶怡寧予婚君
狀貌不逾中人而精強康健至老不衰享年七十有六
思等將以君卒之又明年某月日葬君狀君者君之姪
鄉進士瑀也狀稱君少精舉子業游邑以例補太學
生累試有聲、雅善詩歌好引掖後進成人之美治身
勤儉忍恕皆出性成而獨病其高年不能委家政於諸

子以享林泉之樂爲可憫惜予惟南方自倭夷之變賦
倍常額邑之巨室傾家者十九君拓產旣宏而又適丁
其時譬中途遇風波苟善楫者不爲親操將載胥及溺
然則君之老不自適雖若可憫亦可諒也予故據狀文
畧其細矜其所不及而撫其大者以塞君諸子之請且
謂之曰而翁得是目其瞑乎銘曰

人貳富矣其行則貧或顯爲卿賤同庶人豈不榮好湮
泯無聞如彼植木蹶其本根我以道眼而觀張君爲長
爲夫爲子爲臣刊落浮葩宣朗天真有足稱者視此刻
文

叔祖怡鶴翁墓誌銘

翁諱昂文顯字薛姓厥初河東遷居鳳陽趙宋南渡再
遷江陰入國朝大父士方父守道咸有潛德守道生七
子其季爲翁翁長身偉貌弱冠有四方之志而不屑爲
辭章欲由他途有所進取爰從事郡功曹顧儕輩多不
類已者遂唾置卽閒於耕自號怡鶴主人逍遙物外閒
或臂鷹走馬嘯歌歡呼以舒其豪邁不平之氣當是時
翁材如干將鍔鐔匣而有光者也晚年產擴諸子若孫
咸有成立始棄豪即同類然順適少孤不及養恒以爲
恨因扁所居堂爲思志感也性峭直不能容人之短
亦不欲掩人之長自奉甚約而豐於接賓與物無競而
急人之難若已與有者蓋天性如此嘉靖丁酉

聖天子郊祀禮成明老老之義覃恩宇內以年如例
受冠服之賜宗戚子姓咸拜堂下鄉人榮焉配戚氏先
卒子四人翹挺翊昇孫男八曾孫男二翁以成化四年
生以嘉靖二十三年卒遭際四朝享雍熙之福者七十
有七年人羨其壽而或惜其未遇子以爲君子不遇于
時遇于德昔康衢之民德同堯舜而名稱不彰可謂之
不遇耶如翁者行無頗僻而生逢治平享有遐福其爲
遇也多矣翊等將以是年十二月二十一日葬翁乞銘
工其從姪孫甲銘曰世所慕者壽翁年踰古稀所尚者
名翁行同康衢焉將崇四尺之封表山中之木以鳴我
國家之雍熙使過之者憑式而立歛衽而稱曰此古陶

唐氏之遺也耶

薛君子正墓誌銘

予從叔祖薛子正之治生也不藉手於先業而室廬
壤畝場圃園林與夫蔬果之植器皿之具凡用之所需
而情之所適者無不致其精其治身也不藉教於師傅
而子史詞一方言技藝具夫閭巷之歌謠朝野之典故
凡可以一見聞而資談說者無不涉其槩其曾大父楷
大父塤皆田連阡陌厥考清江先生格登制科任館職
冠蓋傾都市畫錦動鄉閭君生純嘏之中其耳目之所
漸濡心志之所習服一不與陋巷編民同而不見其有
貴公子之習早年失怙遭家多難或訟至累歲或費至

居不及數楹田不及數百畝而處之怡然色養其母王夫人甘旨集若有餘者亦不見其有憔悴不滿之容身長七尺音聲如鐘能食盡碗肩飲至一斗氣可以蓋百夫捷可以輕百里立談間精神光彩旁射四溢厄靡么麼者望下風而避舍使赤松王喬之徒得藉以爲資可立致百千年而年止于四十有九不得臻下壽六將終也念室家新造子甫十齡戚戚以爲憂遺命綴葬以觀身後之所歸故其葬也遲至十有六年而十有六年之間橫逆之加死喪之集公私百務之糾紛水旱螟蝗之迭至邑之富家大室貲盈鉅萬立見傾覆者不知凡幾而君之田畝不虧穰桶如故厥子幼而長長而娶

娶而有孫卒成君志以卽安于里庄村之原者其孺人
陳氏鞠育維持之力也噫若君之爲子可以稱能爲婦
如孺人亦可以稱賢也已君諱供別號夢江清江公之
季子孺人繼墩世族無出子女皆側出子弘孝女二以
弘治己酉生以嘉靖丁巳十一月一日卒今年月日葬葬得日
陳孺人將問銘于予介予姻族人而請焉予適有眩暈
之疾方禁言往返數十未之許也已而累然衰服携其
子款門泣告曰知予夫者莫若子不得子銘懼無以葬
予矍然乃許之銘曰

沒憂稚子葬而有孫曷延厥家佐者內人物無常隆亦
無常地孰寒之疑不繼以暑君所欲者天寔違之天所

欲者時克知之嗟理則然其尚安只一十六年歸休於此

敕封張孺人顧氏墓誌銘

金吾張君省幾之喪厥配也撫時虞變念往圖終謀所以安體魄者而佳原未兆廼今年某月日將權厝于先壙之旁先期自爲狀欸予門請曰予妻吳江顧氏女也八歲失所怙偕母董孺人相依以生自以不獲事父而專意于事母凡女工女誠可以承母志者無弗爲也以是其爲女也有孝道焉既長歸于予爲繼室得侍于母朱孺人于堂自以不克事舅而專意于舅姑且婦工婦德可以承姑志者無弗爲也以是夫之婦也有順道

縣所生一子一女并前妻之子與側室之子若女而七
撫育教誨均平如一不以異意待諸子女而諸子女亦
不自知其爲異出也其母道足稱有如此者嘉靖乙亥
予母卽世旣佐予襄事甲辰歲予就職輦下亦從予于
京邸值廟祀禮成 聖天子覃恩宇內凡在職者俾其
妻皆得以夫官受褒封之典而予妻亦與其榮龍章下
頒焜耀冠帔方自幸遭際不凡而長男思次男念相繼
失偶餘子女亦孺然長大則家事孔棘婚嫁切心不能
安於官矣亟歸經畫爲予婚四男嫁兩女不逾年畢事
而予亦已乞身南歸優游林泉子婦完集又自幸得以
餘年共天倫之樂而後寇竊發延及燕黎則時事孔棘

禍難切身又不能安於家矣觸冒炎暑隨予播遷竟得
脾疾以死與予同憂而予不獲與之偕老予以是重悲
之弗能忘情焉惟是墓中之石敢以請於吾子幸辱不
鄙而賜之銘是惠予妻以不朽而寬予之悲也君與予
世姻又女嫁君之子慶孺人出也予於孺人之行得之
予女者如君宜爲銘謹按顧於吳江爲望族孺人之
歸自京也憶念其母年高謀迎養而其母曾唯適以明
經登第孺人喜曰吾母有托吾無憂矣然終憶念不置
歿之日其母在家忽謂人曰吾女其來乎適見其
形殆將死矣翌日果訃至江陰去吳江潤遠二百餘里
而精神流通若此殆純孝之感之二一
又二享年凡廿

下銘曰初夫育孤勞且劬也播越弗考悲可吁也如鳥成構莫爾居也沒不忘親魂往依也精爽千里何不之也尚茲體魄寧幽墟也

承母須孺人墓誌銘

吾邑倚江作城誰信南北自古稱兵衝皇明治極稍弛海禁以業無告之民而不逞之人遂勾引倭夷深入內地爲中國患自甲寅至丙辰連寇吾邑乙卯歲爲害特甚戕長更圍城邑縱兵肆掠居民鳥驚魚駭城郭不能容至充塞途路踐踏死者無算予時在圍城中目擊其事憫切予心而無以自解也干時相傳有承母者家新村當往來之衝不忍民之流離載薪米匿蘆葦中有遇

者人餉之薪一束米二升每日如之迄於寇退多所全活予聞而義之欲爲作傳以紀其事未遑也明年春予友承君願持狀乞予銘葬其配須孺人啓視之即母也蓋孺人以是年夏積勞至冬而死矣予悲之謂君曰是固宜銘按須與承俱邑著姓孺人之父彥麟擇壻得君以歸之君時爲諸生業舉子孺人佐之以勤凡縫紉織組與夫糗糒饋餉之需所以禦寒暑供朝夕者躬致其潔一不以累君故得以專意問學無內顧之憂姑黃氏性嚴孺人事之以順家務無巨細無勞佚咸先意承志曲致其情姑喜曰是媳能當我意者諸子稍長不使見異物異業一意讀書聞予家居借別友講習後虞菴

中丞步少弘學意欲令於章句外通習義理者予嘗登
其堂聞幾杆誦讀之聲內外相應真若昔人所傳闕里
閭閻遊武城而聞絃歌者也蓋承君固敦朴尚義而孺
人贊襄之益爲不少矣性純素不喜華飾自少至老自
不足至有餘終始如一日未嘗有加焉待姻族馭僕媵
尤有恩不能者誨之匱乏者周卹之夫慈仁儉嗇婦道
之常若慈而知教嗇而知散雖男子尤難之如孺人者
可謂賢也已享年若干銘曰

維皇降命人愛其情器昏播越皇心靡寧乙卯之夏我
在凶城羅網遶天顛踣耄嬰人傳承母倚棹葦汀東薪
儲米人餉斗升憫衆之厄忘己之生終此寇難兵燹弗

驚昔登堂我識承君知有賢配文事潔清從學後虞
三子恂恂曰膺母訓卒業師門凡厥懿美目偕耳均楮
墨無托令德湮淪不傳則銘此吾素心豈其有請諛墓
中人

進士姚君墓誌銘

東南之鎮維江與湖震澤之水出自無錫者至江陰與
江潮合其會同之地爲四河清潌潌泓秀可攬掇宅其
濱者爲姚氏姚氏多文人蓉溪君諱相與其伯仲俱以
文顯蓉溪登正德庚午鄉榜厥子諱廉能字本才卽鳳
津君也幼穎敏善屬文能援筆立成不加點綴甫弱冠
亦登嘉靖戊子榜君旣父子繼美邇傳南部故姚氏以

詩書爲世業而鄉人亦以姚氏爲世科君孝友天性其
母將孺人之卒也蓉溪君方宦仙居逮其母王孺人
之卒也蓉溪君雖家居又以弱疾不能理事君代父
治二喪哀毀如禮以孝聞伯兄廉善蚤夭其配徐苦節
有年君命仲子舜俞爲之嗣訓以曲致孝養徐氏所以
得完其節俾伯兄無後而有後者君之義也性坦夷率
直意所不愜輒厲聲然中無城府人憚其伉而樂其易
事自奉檢約理家政課農治生纖悉具備然視他士人
高者藏機以釣名卑者武斷以邀利則吐舌不敢爲也
旣累試春官不第欲就職銓曹又自度不能與時俯仰
故一意問學冀終有所成就丙辰春在京師忽患風眩

歸越歲竟以是疾不起吁可惜也夫天之於君厚之以
俊才發之以文科不可爲不遇矣竟不使登一第享中
壽以大其設施豐之於前而嗇之於後此則理之不可
知者然吾聞其昆季多有聲場屋諸子亦駿駿進取豈
將以未盡之福昌厥後耶果然君亦無憾也已享年五
十有一娶薛氏子五人君與其內弟邵主事薛君暨
南同科年亦相若先一年暨南卒於官予爲詩弔之有
鄉居朋輩盡之感噫今又喪一人矣狀君者予表姪鄉
進士徐君汶來乞銘者君之子舜欽也銘曰

姚氏之先發源忠臣嘗守吾常殉國以身從自宜興寔
維孫亮由君邇之六世以上君生偉然百夫可降戰藝

詞場莫我敢當扶搖待風如彼鵬翼孰云中道廼鍛其
翮君數不偶而志何窮寶玉之氣上摩蒼穹暘溪之陰
四水所環孕靈茁美君宅其間人亦有言善必復始天
苟昌君庶其在此

薛延墓誌銘

甲先人浮休先生生二子長布次卓皆予兄也先生以
宏材碩學高蹈一世而長兄亦復蹭蹬不偶以故次兄
無意進取游心丹青翰墨間而以家事付其子延俾力
耕以供朝夕延生穎敏讀書史能通大旨與其成敗安
危之迹賢人君子出處之致心有所可行亦趨辛卯
歲予謫官楚藩常患心不一每晨五鼓必衣冠危坐以

需日出延悅之平然。而然歸見其族人皆大驚以爲進
于學也。而不知其學非得之。繡簡者也。性倜儻好關人
之急尤重。然諾鄉閭有不平者爲之平。其不平咸意滿
年踰五十患症冲迺徧訪方伎及空心釋典諸書頗能
禪悟故雖返壯無期而以善于調攝與疾相終始者十
有餘年忽一日。其子曰明日吾逝矣。至期日將中盡
屏左右婦女。一。無譁遂起。與櫛整襟而瞑時甲子七月
二日距其生。某年月日也。享年六十有四娶朱氏生
子二人孫男一。八夫人者靈氣所聚心靈則無所不通
耳目所及皆可以爲學不專讀書此之謂致良知而世
之讀書者或反不達何也由未知致良知之學不善用

其靈也延其賢乎惜未見其止予以是悲之而遂銘之

銘曰

一氣之靈結爲七竅一竅中通形神合妙由學而成匪由學有延今已矣其尚知否

明兵部右侍郎胡公神道碑文

明有大臣族不傳而人心有譜葬不具而公論有祠行不同而考於義有合者曰蜀嘉州胡公子昭公之沒去今百五十年嘉州去吾常之江陰亦八千有餘里以予之穎蒙不學無所考信而能知有公者以有公卿人彭程二公之傳記與州誌故老之傳聞也故曰不待族而諸華除年靖難師起公以兵部侍郎與其師方公孝孺

同死國事凡人道送終之具與春秋祭享之禮無一備者乃今龍山之陽有宮有額又有祀田以供蒸嘗而公與其弟志遠女金奴血食一堂輝映千古則今鑒察御史豐村金公之爲而予以分憲茲土贊成之也故曰不待葬而祠然公以社稷重臣海內名士當我文皇帝重清六合之時而不能與解楊諸人共致雍熙亦或有以從權之事望公者攷之聖門則孟氏願學孔子孔子見南子不拒佛肸而孟子不與右師言不以手援天下者公實類之意聖賢有定分公雖欲捨其所不可而學聖人之可有不可得者此予所謂攷於義而合者也語曰聖達節賢守節公之行守節之謂也公字仲常爲人剛

毅篤信初名志高以榮學訓導見我太祖高皇帝賜今
名遷官翰林當是時文學之士滿朝而公獨師事方公
講性命既赴市曹終就戮矣猶作詩諷朝貴從容不變
蹈刃如歸此其大節之中又有可聞者如此以予所聞
推所不聞知公他行多類此者而以時諱不傳爲可惜
也雖然有諸君之文有豐村公之舉亦足以不死矣公
無墓道宜無所樹碑顧安侑于此則明靈出入可以義
起而予以職事承諸公之後亦當有詞銘曰

峨山東馳結爲榮川靈秀萃之是生大賢胡公之生遭
時遇主命名擢職簡自天子既得所事爰擇所師侃侃
方公講論不疑雲雷滿盈江河盪激公以一筆欲扶人

極豈不自知力之不任大義莫逃以靖吾心方公徇生
公死亦繼玉映金輝千古增賁凌雲之巔巍然有宮邦
人所築霜簡所封月映清江光生棟宇公神來歸照我
桑梓秋嘗春祀蘋藻馨香公偕弟女笑語同堂公名我
知誰會無譜公神我依誰爲無主人心不泯公祠不亡
有如不信視此銘章

處士徐君墓表

墓之有表者何古之君子有殊功茂德克堪表揚而樹
之墓道者也其次則嘉言懿行有可取節者君子亦不
欲泯焉大江以南無谿山之險故其地多饒腴無戎夷
之擾故其民多暇裕富家巨族田連阡陌奴畜千指分

曹蒞事繩繩有條而主人晏如也傳子若孫恭養安逸
浸不知戶外事則豪奴悍僕得以趙趙其間而簸弄玩
侮惟其所爲以吾邑觀之用是敗家者先後種種廼有
徐君者生六年而孤又七年而總家政公私百務山疊
川委以其幼未習也不數年費其產之半君一日忽沉
吟思曰是可知矣易紃綺以布韋易膏粱而蔬素凡平
日玩好不急之物盡捐以償所負於是檢索簿書周知
其田廬之肥瘠高下者習熟公府詳悉其賦役之緩急
輕重者剔蠹搜奸靡間寒暑心謀指畫具有成算然後
斟酌劑量隨事應機如刃運的破無不曲中又不數年
故產盡復且加豐焉夫易戒冥豫書譏耽樂自古世祿

鮮克由禮而君乃能一旦翻然悔悟如此使世之承藉
先業者皆若而人則宇宙迄今豈有亂與亡之禍哉君
諱沾昆仲三人君於次爲季故字季修鄉進士諱經之
子鄉進士諱元獻之孫而宋知開封府諱錕之玄孫也
開封君扈駕南渡肇家江陰八傳至本中入國朝以人
材徵使蜀事浚乞歸養本中生景南於君爲高祖正統
間捐家助國有卜式之風詔旌其廬景南生願任中書
舍人益大厥家聲延江南君性資穎悟通經書曉大義
以專意幹蠱遂棄舉子業弗習或勸之輸粟可易章服
君曰吾學與力豈不足耶顧未暇爲耳其篤志如此故
能斬截外慕屹然成家君治家如燕趙武人奮不顧身

其持身如晉魏公子霜可履葛然小心畏慎非理毫髮
不敢爲故終身不辱亦無怨者娶夏亦名族克相夫子
家道之成與有力焉子三人予與君世姻而予齒差長
知君爲詳君之他行可紀者已具於都憲陳虞山公
之誌茲故不贅而獨其不染流俗超然風氣之外者
遺諸其孤俾表諸其墓且爲沃土之民勸焉

吳濟薛先生藝文類稿卷之十

畏齋薛先生藝文類稿卷之十一

南京戶部郎中門生徐材編輯

戶部郎中門生沈奎校正

行狀祭文贊銘傳

贈光祿少卿鶴洲錢公行狀

公諱鏞字鳴叔別號鶴洲其先湖洲之吉安人七世祖
喜興事我太祖高皇帝有戰功授職千戶調遼府左衛
嘉靖十八年改調顯靈衛護獻皇帝陵寢祖諱康父諱
最生公公生而岐嶷稍長知讀書補庠生己酉中湖廣
鄉試庚戌登進士第觀政于通政司壬子歲來知江陰
縣事江陰濱江邑也上接留都下通兩浙天下有事勢

所必爭公始至釐輯庶務未遑煖席聞浙中倭寇猖獗
朝議添設總督重臣公度彼中備嚴賊必北上亟完城
郭之未完者明年賊果犯蘇松時承平日久民不習戰
應敵者以吾邑之兵爲最而邑之精銳復殲於太倉人
情大駭公召募補葺城守僅完又明年四月賊至公遣
兵逆之於斜橋三戰不利退營定山賊覘知城中有備
不敢近大掠而去歲值旱飢邑中之盜亦起公多方撫
字擒其渠魁魁諸法而解散其餘黨村鎮以寧定歲之
冬倭寇據柘林今年春復至三丈浦急趨吾邑之青陽
鎮掠商賈之資欲還而三丈浦之巨舟已爲大叅任
公所焚焚商趨無錫攻城不入還趨江陰公禦之於石

擄矢盡繼以瓦石公身被一箭賊遁出江而去公度賊志未滿必將復來預營於華墅待之賊果至官兵斬首九級相距不得進遂大合常熟之寇三工餘人從江路分半寇靖江其半入蔡港登陸而來時公方率邑中之兵從兵憲王公援靖江不虞賊之至也得報亟還甫入城而賊已至大橋明日攻城不克退營於蔡涇間距城九里爲久駐計每日分黨四掠烟火接天鄉民入城避寇者日近萬人公痛憤欲決戰而我兵不滿四百人合狼兵與鎮江之兵僅滿千人遂率之出城搏賊先是狼兵縱肆公懲以法衛公至是遇賊先遁餘衆望風亦遁公獨與親兵五十餘人奮前迎戰俄而草間伏起刺公

公身被數刃遂遇害從公者二十餘人皆死死之時雷
雨晦冥不辨咫尺賊持公首懸之營其夕募謀者得之
始克完殮城中居民聞變慟哭家戶設主事聞朝廷有
官光祿少卿蔣一子立祠於縣歲祀之公愛民之仁由
於天性不忍纖芥有傷目癸酉用兵至是凡三歲而民
不知有軍興之擾小民見事之集而亦不知費之所自
出也自奉清苦儉約旬日不茹葷憤民被寇難時或不
食或食輒嘆咤推案曰張睢陽亦人也家人勸之自愛
叱之曰有怕死忠臣乎夏季應支俸獨已俸不支曰民
傷如此何以俸為潛以印印其裏衣恐郊原莫辨也蓋
公瘞民之深志在必死矣公政事所經其編緝

與水利捕獲之法具有條貫公之編徭也酌量貧富不
泥成法雖甚富不使困如庫役之類亦有貼其次富之
家一役重則餘役皆輕故公所編徭人以爲便補水
利也曰江陰濱江爲邑仰給江潮故水利有官導河有
夫比他縣爲詳而開濬之事累歲不講潮沙壅淤歲厚
盈尺今通潮之港皆爲平壤矣旱則潮不入澇則水不
出小民如之何不餒以死也吾欲均諸港以次而濬之
約五年一遍工鉅者動官錢工小者使得利人自爲之
庶其有濟乎遂開青陽河汴餘港數條以爲式是年果
有秋餘未濬者所入不及也其論捕獲也曰捕盜不如
弭盜斜橋包港之多盜非民性則然勢使然也此地西

去縣治九十里東去太倉州治二百餘里民有負販之
利而濶遠官府莫爲禁制其爲盜固宜今若割江陰無
錫常熟三界之地別立一縣使有管束則盜自弭矣因
條五利上之公與無錫王尹先後履任王尹量無錫之
田甚利於民公聞之曰吾邑亦猶是也富民子孫產盡
而戶不知除豪猾里書飛詭而官不知檢戶已絕矣而
黃冊之田每會一增誰其增之他如佃民之移易坵畝
穰爲已業皆弊也吾欲爲之彼其先我矣倣前任黃公
傳爲公鉅之法村鎮無賴爲民害者廉得其名以漸除
之一縣稱爲神明初政頗傷嚴切逾年而更之以寬或
盡日不嘗一人至府必訪荆川唐君君勸之讀伊洛諸

書亦雅善予每日謂根器未利於道未有聞有當道者以飛語作色於公公不能堪立什當道者大驚予貽書以三自反事質之公大愧悔謂予曰此後雖唾面不敢復爲此矣其服義如此公資性穎悟而剛果直截使加之問學濟以寬和遲以歲月其進尚未可量然即今所自成其卓然特立之操所以挽頽風振名教者亦旣遠矣公尚禾有子其夫人蔣氏宗室光澤王之甥女先公死事之四月歸侍公母太夫人周氏于堂六月十一日生一子而公以是月十三日遇害嗚呼仁者必後天道其有知也夫女一人許字翰林某官某之子公生於某年卒於某年享年三十有一卒之三月其二弟鍾鑑來

迎公喪并輯公家世與其行實請狀于予將以告于太史氏而乞銘焉予不敏何足以狀公顧邑人愛公之情不容已也謹爲之狀

亡荆邵宜人行狀

宜人邵姓錫邑人也父惟忠號一桂邵望於錫而一桂爲邑善人生甫二歲而一桂君卒無子母吳孺人鞠育教誨以迄成人旣長歸予迎養其母凡生事卒葬之禮無不曲盡至於歲時奠獻哀感傍人咸以爲有子弗能過也予時爲諸生就館鄉塾薪水之費或所不給宜人攻苦食貧親操井曰予之所以得一志於學而無內顧之憂者宜人爲之也予釋褐登第選授兵科宜人喜曰

此特恩也何以報國既上封事得遠謫宜人怡然就道
自此蒙恩晉秩倅於浙貳於保定臬於蜀於江西奔走
往來動踰千里皆携妻孥以從予之所以得一心王事
而無室家之累稚弱子女生長道途而得免於風波疫
癘之虞者宜人佐之也予年踰三十未有子宜人謂予
曰君子重無後禮有側室年及此可緩乎乃訪諸鄰邑
得武進談君之女士族也爲予聘之以妯娌之禮禮之
已而宜人先有子人以爲善念所感也性慈仁愛僕隸
子女亦若已出其於諸子女可知已尤不喜紛華諸子
爲具食中有肥甘則不食爲具衣中有綺麗則不衣予
以爲是偶然耳至於白首亦莫不然其素蓋天性也

予林居十有八年宜人爲予婚四男嫁三女俾各有成
立室燬於倭又助予拮据卒瘞苟完容膝百與予儻
居邑城蓋自甲辰以迄辛酉凡婚嫁之費木之工至
是粗畢意謂自此可以偕老餘年而宜人一
生也若婦道有待爲予而生其沒也若婦
而死舉昔日之所心期者不獲一共享其成而獲而餒
齏而不衣若宜人者詎不重可悲夫宜人以弘治壬戌
四月二十日生以嘉靖壬戌三月二十四日卒享年六
十有一子四人長遇娶予同年廣西上林縣知縣徐君
啟峯女次逢娶福建歐寧縣主簿夏君秋厓女次造娶
光祿寺監事張君禹江女次迎娶春元姚君鳳津女次

遣迎皆邑庠生又四人長適朱可事次適徐正容次適
張慶次適陳之偉孫男二壽祖繼祖葬之日卜言於來
歲正月二十七日將以是日安厝宜人於一堡里之原
竊念甲一介草茅荷蒙我

皇上拔擢生成俾得保有妻子又荷郊祀覃恩錫之冠
被以焜耀其生存恭誦誥詞有曰禮嬪備宗訓閑女誠
與匪承式練布是甘噫若宜人者籍通中禁行著絲綸
存沒榮哀宜若可以無憾顧佐予成家而不獲一食其
報此則感召之理有不可知予心所不能無戚戚者惟
是墓中之石得假靈於當代宗工以尊閭王章垂諸不
朽庶可釋生者未盡之感而慰其子若孫無窮之悲用

是收淚撫其大都藉手以請於名公鉅人備採擇焉

陳子達哀詞

子達諱詞予同年友也始予既第眷官顧予學於道未
有聞懼焉以質於友生惟子達予信也信之久則相與
從事師友交質所疑方是時予冥行索途有任重道遠
之憂意輔予仁者子達其一矣未幾各授官予以言謫
子達亦以憂去不相聞者遂四年再見而子達學益進
予自視益不及方冀觀厥成以卒所求無何而子達以
訃告矣悲夫功名壽考咸有盡時不足爲吾友惜所可
惜者子達有向道之志而天不卒相其成也子達之沒
在京師予不及視斂葬又不獲撫其封而遺腹之孤賴

然秀出予視之肖甚將天所以終子達之志者庶其
此作哀詞以詒之詞曰

嗟予既長兮道未有聞與子相遇兮憂心殷殷予言偶
合兮子不予違從師取友兮差肩並輪子秀以敏兮予
鈍而遲冀子得雋兮坐收奇勲孰天不謀兮不使難老
鵬鵬鍛翮兮干將毀鐔道惟悠遠兮既廣且長有生弗
成兮伊數之屯貴考有窮兮予豈子嗟子有後嗣兮終
焉未伸備官蜀都兮去家萬里子歛不視兮葬不撫墳
感念疇昔兮慘怛在疚詞以末哀兮冀其後人

禱雨文

惟神山王游衍蓬壺監孔嚴休咎之徵不棄毫髮今茲季

夏之月律中林鍾盛陽行空羣陰茁壯百穀含英咸望
時雨而泉源枯縮膏澤不流小民嗷嗷大命近止此豈
神之所忍歟誠某等守土無狀無以媚於神明而神降
之罰也誠某等德不下及情不上宣自速罪戾而以并
累於吾民也在位者則有罪矣民何辜焉神聰明而正
直不貳而不憚敢望宥其不恭而亦助其不及俾雨時
降田卒有秋茲土之人得以給賦稅足衣食未享神之
賜某等亦得以少逭責任毋重得罪于神明悔悟自衷
昭假無羸匪敢以虛辭彌文徼脫福戾惟明神其監之

祭龔君文

嗚呼風蕭蕭兮忽振雲霓霽兮輕浮燕喜翻兮潛影蟬

寂寂兮辭秋悲夫君兮令德美要眇兮宜修播芳馨兮
詩禮流潤澤兮箕裘鳳將雛兮丹穴驥騁駿兮神州排
天門兮射策掉郎署兮鳴鞭蜚英聲兮騰茂揚德譽兮
分猷壯干城兮藩輔秉憲度兮遐姬庭訓昭兮炳煥祿
養渥兮優游方食報兮罔極胡形離兮神遊如玉斗之
碎於鴻門兮至寶不復如銀銖之墜於金井兮轆轤不
收徒俾生者失聲而長號兮望旻天而常愁昔偕令子
神文小投聯第同官善友咨諏宜供事於執紼重職守
之纏紉用是寄哀一奠心往形留嗚呼情之無兮江
水悠悠鑒之哉鑒之哉

祭江東神文

惟神德祐一方威昭列郡邇者草寇竊發殺官戕軍某等以守土之故假靈於神神歆其誠賜以吉卜吳山頂上之議成功果出於東南鑽龜有分之謠獲醜竟符於甲戌荷陰靈之默相啓衆志之潛孚茲土宇載寧敢忘報告謹以牲醴之奠致祭于神所有錢幣一圍用將誠貺神其鑒之

莫鶴州錢公文

嗚呼某慟侯之死而又善侯之能處死也誦侯之政不能不爲吾邑幸而探侯之心又不能不爲天下惜也堂有慈親庭無弱息吳楚千里山川夔隔倚門之望其情何如失聲長號而以喪歸此吾所以慟侯之死也海宇

承平卒墮將驕倭寇竊發望風而逃侯以儒生寄命百
里事不避難繼之以死江南武夫其屯如林聞風頽顏
能無奮心人生大閑曰仁與義平生讀書所學何事仁
以爲冠義以爲裳翺翔直上千載之光此吾之所以善
侯之能處死也令吾邑者賢良相仍夢弼之毅文源之
清清不可澆毅不可干侯於二公伯仲之間陰慘陽舒
時國時關侯之處常人猶可及從容鎮靜履險如常侯
之處變人莫可當兵歎交加繼以盜賊我邑非侯其何
能國古之循吏惠在一方名昭汗簡渤海南陽此吾所
以誦侯之政不能不爲吾邑幸也稟賦高邁踴厲奮發
有不可人視猶蟻蟻時乎肆論予默而還侯退而思豈

或未然壬子之冬隨計北樞貽我以書曰未聞道既其
返邑鏐歛鋒利厲薰爲和易嚴以寬伊洛緒言反覆細
繹或期予途或訪予室寃侯之志欲爲古儒望學今人
煖煖姝姝充侯所造因心而發貌飾庸違非其所屑宜
厚厥養以大其施民之不祿而止於斯此吾所以探侯
之心不能不爲天下惜也噫侯在吾邑今爲雨爲暘侯
歸天上今爲龍爲光朝有卹典今野有蒸嘗侯則無憾
今我心悲傷曷寄予哀今莫以報漿

祭任母趙孺人文

自古天祚人國將生賢才以贊其成則其扶輿盤礴之
氣必鍾於賢淑以誕發其精英而夫人之被其陰澤者

亦必推原反始冀祝頌乎千齡懿哉夫人孕和葆貞篤
生令嗣祐我皇明提百萬於江左橫南海而走天聲區
區醜類十已剪其四五所存餘孽指日盪平天胡遽奪
夫人之壽使令嗣哀號毀瘠而我輩不得覩其澄清跼
天踏地曷究此情嗚呼古有墨纒式著令名吾將援情
起義請諸廟庭酹地長號敢告明靈惟靈其鑒之尚饗

祭唐太守有懷文

惟公以文學爲世業以簪笏爲家傳牧於州也有子惠
之德官於戶也兼撫字之賢翺翔大府式布旬宣衆方
仰其大用而公已奉身而周旋優游林下餘二十年詩
酒之社風月之前望之者知其蕭然物外未始不以爲

神仙不盡之福宜享期耄胡奄忽而長捐某於令子辱
交榜末驚下之質時荷鞭策實公義方之訓所以裕後
而波及蒙顓圍城之中忽爾聞訃不能匍匐視歛真籲
地而呼天茲旣寧矣敢瀝微涓惟公其鑒之

薦陣亡勇士疏文

伏以生必有盡聖凡同歸於一丘勇且知方志烈自甘
於九死自倭夷之倡亂寇我一方肆金革之徂征迨茲
三稔爲妖爲孽殺人越人哀爾卒徒惟茲鋒鏑操戈被
甲雖喪元之不忘蹈火赴湯實捐軀之可憫倉惶旅殞
漂泊玄宮或嗷唧於天陰雨濕之中或哀號於烈日狂
風之內臣爲君而子爲父固知死者之無嗟魄歸地而

氣歸天實則生人之當盡已捐樂土奉英羣靈猶恐巫
陽缺招臯某難復英靈耿耿尚默藉於神扶長夜冥冥
冀潛通平法照謹涓某月日建清醮若干分俯披囊素
仰啓人天所願拔忠魂于三界之深超義氣於諸天之
遠薄城內外早脫輪迴累劫冤親同登道岸謹疏

祭王宜人文

乙卯之冬天地示異以益我

聖天子宵旰之勤秦晉以南遠及許洛山崩地裂方數
千里此乾坤之大變而古今所未有也當此之時城廬
摧圯覆壓生民不知幾萬萬人雖堯舜故都聖賢陵寢
鮮有得其寧者而夫人以子貴之故迎養東南變不接

於耳目慘不切於身體謂非天之所獨厚而非他人所
與知者乎生必有死猶晝必有夜陽必有陰惟其考終
是以爲貴今也天清於上州寧於下而夫人以耄艾之
壽違養官邸嘗藥者令子茹辛者諸孫執紼者官僚攀
轅者黎庶令終令始有哀有榮謂非夫人所獨得而非
他人所與能者乎令子分閭志在澄清胡然縷經奪我
長城柰之何哉柰之何哉吉日甫臨靈輶在行聊陳楮
幣以識不平惟靈其鑒之

祭唐荊川文

嗚呼維昔公之處也以道其出也以時養既高矣弗竟
厥施嗟乎天乎胡不憖遺予與公極忘於富貴形骸之

然而相期于逍遙汗漫之歸不虞公之舍我而出又不
虞公之先我而卽於幽墟也死生常理公諒弗疑追感
曠昔增予之悲寄哀一奠有滄漣而尚饗

祭張光祚文

嗚呼謂天爲無意耶曷賦子以文謂天爲有意耶曷嗇
子以壽伊大化之推移恒渺茫而莫究純粹如子道岸
可希溫溫其恭匪棘匪徐昔偕諸友從予後虞論文輒
最大受與期譬彼騁駟徐步康衢孰或梗之摧轅敗車
慈親在堂子幼靡知門戶之衰孰撐孰持人孰無死莫
如子悲臨風長號寄以奠詞尚饗

祭水南張公文

嗚呼予之少也沾丐芳潤如鼯鼠之飲滄津惟公之文
予之長也坡拂冲和如草木之被陽春惟公之仁今而
老矣踽踽涼涼八如孤鶴之處曠野而忽失乎鸞鳳之
羣則予于公之沒也安得不盡傷五內而失聲乎秋旻
嗚呼痛哉嗚呼痛哉惟公之出天子知之既其處也天
子思之沒而葬之祭之則之公之學雖未究於大用而
高文大典所以黼黻乎皇章者多公之鉅筆公之位雖
未迄於大受而名賢碩德所以弼亮乎皇猷者多公之
門人若公者可謂死而不朽亡而有存復何憾哉復何
憾哉小子於公無能爲役而公愛之過殷期之過深至
謂片紙隻字亦必難之隨言而擬公之心神遺言在耳

聆響如聞高山流水失我知音能無痛哉能無痛哉尚饗

祭黃處士文

嗟哉黃君我觀當世美君之積其口津津利君之有其行慤慤或以此而多之或以此而少之雖百年之中反覆萬狀要不出吾前之所云然則少君者固未足爲君病而多君者適君所以自役其身者耶有美如君譽延縉紳紛華盛麗不以揆心使得捐其所有而展其所長亦自足以未終譽而繼前聞奈何哉君之先世旣重君以計然之托而造物者又以上式之才寵君之身此予於青黃災木之喻不能不致意于昌黎子之遺文也雖

然維君有子我窺其藏汪洋浩瀚不顯其光充而大之
其進未可量也則又安知造物者不以此而慰君之不
亡者耶我室伊邇我懷孔長姻婣之故酌酒辦肴惟靈
其鑒之尚饗

祭封君劉午山文

大江之陰亘以連山淳朴萃之匪涉澆猥猗歟劉公篤
生其間恂恂爾行溫溫爾顏挹其潤者如春陽甘雨之
披拂卽其和者與騶虞麟趾而週旋積善自我食報於
天令子發科孤鳳高鶩既蜚英于郎署亦振績于名藩
公享祿養優游林泉龍章焜耀鶴髮踟躕意期艾之可
必胡一疾而未捐公則往矣羣望未貳計公易簀未幾

而令子超遷之命已掩映乎朝端豈其以有限之年
諸造化而留此無疆之慶將綿歷于無前也耶龍蛇之
嗟昔賢所嘆寄懷一奠能無潸然尚饗

自贊

身笏我冠人瞻爾前暗室屋漏神鑒爾後像乎像乎爾
母影響以爲真而丹青以爲富也

雙梧龔君像贊

其和也天倪其止也地文居貧而有有餘之色處市而
無不足之心與子論交四十餘春吾見其可得而繼者
毛髮之假不可得而變者肺肝之真超羲皇以言邁所
混沌而卜鄰若夫君者其誰不曰古之人古之人也耶

達摩隻履圖贊

井跋

達摩西來上乘一枝始流東土故遺隻履示意此乃
無履之履不着之着也而徇象之人傳以爲異不亦
誤乎仲山王先生遺予此圖予愛其精神橫逸旁蠅
四偶宛然西來意旨輒爲贊之

衣鉢西來隻履亦落彼何人斯下此一脚有着非履有
復非着噫斯履也其斯以爲絕塵而奔踏破五岳者耶

銀海重光偈

井跋

昔阿難童子以拳耀明心裴相國休以鷄聞悟道予
友高君潛而復明此悟道之機也偈以問之

開眼見明光生一室合眼見晦光通西國謂海非耶明

未嘗失謂明是卽置晦何域遇明而欣遇晦而戚欣戚
外緣內生狂惑彼至人者晦明若一卽色成空卽空成
色空色如如心光罔極不見阿難因拳悟入不見裴相
聞鶻遺識金篋爲虛天眼爲實傳語高君明非外得

雙檜圖贊壽徐君夫婦

厥範伊何玉質金相厥配伊何鳳翥鸞翔遠而望之若
冀缺之饒耕於野近而卽之若孟光之舉案於堂欣懸
弧之伊始羅子姓而稱觴徵蟠桃於北海來青鳥於西
方吾將使王母致詞安期擊節歌偕老之佳什期合德
於無疆也耶

悟空寺重修塔銘

我心不發乾坤毀絕我能發心寸草金身有相爲妄無相爲真茲塔興廢可以觀心以塔證心因心顯塔普願衆生皈依佛法心心不滅法法常新留此心塔永鎮法門月建己丑歲在庚申表年繫月以詔後人

硯銘

噓而生煙吸而流泉出其餘足以潤物叩其有不越乎方寸之天硯乎硯乎其殆終身與吾相爲周旋者乎時嘉靖癸亥秋七月十有二日夢有以硯求銘者惺而記此

得心經石刻列之屏障紙不足以偈補之

筆此經者無幾矣真天閣此經者非眼耳舌混然一

元經百千劫何毀何成不生不滅而予偶得之屏障是
設是謂無相之相不說之說噫會五意者可以歷祗園
於剎那納須彌於一髮豈止曰經典所在之處卽爲有
佛而已耶

李君秋崖傳

秋崖李君諱葵字子忠世爲常之江陰人國初有名子
開者給事刑科以直聞逮君父晟宗號墨軒博學洽聞
以文顯遂爲邑之望族君爲人明白坦夷不設城府與
人交不爲鈎棘而中持耿耿莫可播撼生丁國家全盛
時邑之人漸含膏澤稍以靡麗相尚而君獨敦行孝弟
家雖貧而能以菽水之奉結二親歡心篋無餘留而能

使昆季妻子咸有自得之色人所好者君弗好也嘉靖
癸丑

聖天子臨軒策士君子科以對策登上第歷任行人禮
利給事中稍能分俸以供祿養人意君考高宜少從時
好而君布素如故不統綺不騎乘徒行里閭嘗喜自
若君所爲者人亦弗能爲也縉紳士大夫往來邑中者
欲見或弗可得而時與里中耆艾爲真率之遊月夕花
晨無席弗與鄉人以事干者拒弗受間有疾病則老藥
施之且樂育其子矣是君所爲大抵如此蓋性然也嘗
憶念其子一三京師京師諸貢人雖聞君名爭迎致居
頤頤曰我知君人矣

舍君懇留弗能得遂上

封事請假送君時庭禁方嚴

聖天子嘉給舍君之孝俞焉遂得歸歸踰年而疾作亦不復起人以君爲先覺君旣沒而潛德幽光誦者不置于是編脩合齋曹君狀其行少冢宰潯陽董公誌其石大司成水南張公表其隧其鄉人薛甲以三國史之言於書法有富他日觀風使必有採者爰捫其槩而爲之傳

論曰夫大羹玄酒淡泊無味而登之清廟則醴齊莫先焉秋崖季君不爲矯矯之行翕翕之名而流風餘韻能使當時慕之沒世稱之茲爲大羹玄酒之先醴齊者歟

覽觀前史每於列傳之外別爲凡例以處孝友獨行之士若君者真其人矣

存齋先生教言跋語

黃生道旣刻存齋先生教言而未喻厥旨問說于予予應之曰此二篇者子程子爲道術分裂而言也仁即性也存仁即所以定性也仁根于性性無內外則仁無內外中庸云性之德也合內外之道也此言性之無內外也孟子云仁者人也合而言之道也此言仁之無內外也何以明之今夫孩提而知愛親旣長而知敬兄愛敬者仁也而人皆知愛人皆知敬則仁無不在焉以其根于性也循性而發則愛敬之理不假外求而仁不

用矣夫何内外之可言乎道術不明始有是内而非外者不知吾心之通乎物理而欲絕物以求明其心此楊墨佛老之見孟子之所謂忘也求照無物者也又有務外而遺内者不知物理之具于吾心而欲卽物以窮盡其理此訓詁詞章之見孟子之所謂助也鑿以爲知者也不忘卽助不助卽忘入主出奴各是其是則内外合一之旨不明而思孟立言之意隱矣子程子憂之故因論訂頑而發須先識仁之旨又因論定性而發靜亦定動亦定之旨如曰防檢曰自私則指是内非外者而言也曰窮索曰用智則指務外遺内者而言也曰天地之用皆我之用以明物我同體之義而仁無内外可知也

曰廓然大公物來順應以明澄然無事之義而性無內外可知也此子程子所以繼思孟之傳者也存齋先生合併示人將使學者反觀而自得之而楚侗先生所謂入門須識主人翁者可謂一言以蔽之矣學者服膺于此而有得焉則凡知行存省與夫博約忠恕誠明之說皆可即此通之而知其爲合一信乎色色可辯而存齋先生引而未發之意不益彰之矣乎